

Contract da fusiun Andiast-Breil-Vuorz (versiun 11) (stan digl 1 da matg 2017)

I. En general

1. Las vischnauncas politicas d'Andiast, Breil/Brigels e Waltensburg/Vuorz fusiuneschan el senn digl art. 87ss. dalla Lescha da vischnauncas dil cantun Grischun.
2. La nova vischnaunca fusiunada ha il num Breil/Brigels e secumpona dils tschun vischinadis Breil-Vitg, Dardin, Danis-Tavanasa, Vuorz ed Andiast. Ella fa part dalla Regiun Surselva e dil Circuit electoral da Rueun. Igl uoppen dalla vischnaunca fusiunada ei aschuntaus alla fin da quei contract.
3. Resalvond dil consentiment dil Cussegl Grond passa la fusiun en vigor ils 1 da schaner 2018.

II. Effects giuridics dalla fusiun

1. La nova vischnaunca entra ellas relaziuns giuridicas dallas vischnauncas veglias.
2. La nova vischnaunca surpren la facultad e las obligaziuns dallas vischnauncas dad oz inclusiv ils credits concedi.
3. Tuttas collaboraziuns intercomunales existentas enteifer il perimeter da fusiun vegnan sligadas cun ils 31 da december 2017. Ulteriuras fuormas da collaboraziun vegnan menadas vinavon resp. adattadas.
4. L'administraziun communal vegn installada a Breil-Vitg.
5. La suprastanza communal secumpona da tschun commembers.
Per l'emprema perioda d'uffeci secumpona la suprastanza da treis commembers dalla vischnaunca veglia da Breil/Brigels e mintgamai in commember dallas vischnauncas veglias d'Andiast e Waltensburg/Vuorz.
6. Mintga vischinadi ha il dretg da minimum in sez el cussegl da vischnaunca. Il cussegl sa vegnir abolius suenter ina legislatura tenor la costituziun communal.
Per l'emprema perioda da quater onns secumpona il cussegl da vischnaunca dad otg commembers dalla anteriura vischnaunca da Breil/Brigels, treis commembers da Waltensburg/Vuorz e dus commembers dad Andiast. Las elecziuns vegnan fatgas ellas veglias vischnauncas tenor dretg vertent: Ad Andiast ed a Vuorz succeda quei da radunonza communal, a Breil all'urna.
7. A Waltensburg/Vuorz vegn menau ina scoletta naven dalla realisaziun dalla via da colligaziun entochen igl onn da scola 2021/2022. Schebein la scoletta vegn menada vinavon a Vuorz decida la vischnaunca nova suenter haver tratg en consideraziun ils fatgs pedagogics, socials e finanzials.
8. Denter ils vischinadis da Waltensburg/Vuorz e Breil/Brigels vegn realisau ina via communal. Per tal intent vegn en rama d'ina meglieraziun generala approbau in credit ell'altezia da brutto 5.1 milliuns francs. La via ei definida sco via da colligaziun communal denter ils vischinadis ed ei da construir aschia, ch'ella promova buca il traffic da transit. Ei vegn relaschau in scamond da carrar per autos da vitgira ed autocars. La suprastanza dalla vischnaunca nova ei obligada dad introducir ulteriuras mesiras che reduceschan il traffic sche quel crescha considerablamein.

La zona da tempo 30 el vischinadi da Waltensburg/Vuorz sa vegnir sligiada mo sche ina pluralitad dils votants dil vischinadi da Waltensburg/Vuorz sustegnan quei.

9. Enteifer la nova vischnaunca valan per tut ils purs e cultivaders ils medems dretgs. Plinavon vala in predretg d'affitaziun dil terren agricol, dallas alps e dallas pastiras en proprietad dalla nova vischnaunca en favur dils purs e cultivaders dallas anteriuras vischnauncas e quei entras las organisaziuns ch'existevan gia avon la fusiun, pia il status quo.

III. Proceder

1. La votaziun davart quei cuntract succeda a caschun da radunonzas communalas che han liug ina sonda allas medemas uras ad Andiast ed a Vuorz. La vischnaunca da Breil/Brigels decida la dumengia suandonta all'urna.
2. La suprastanza interimistica elaborescha la constituziun e la lescha da taglia. Las anteriuras vischnauncas elegian il cussegl da vischnaunca.
3. A caschun d'ina sesida constitutiva dil cussegl da vischnaunca vegnan la constituziun e la lescha da taglia deliberadas.
4. Las votantas ed ils votants dalla nova vischnaunca voteschan all'urna davart la constituziun e la lescha da taglia ed elegian la suprastanza nova.

IV. Disposiziuns transitorias

1. Ils treis presidents communalas fuorman ina suprastanza interimistica per las lavurs preparatorias per la fusiun entochen che lezza vegn realisada. La suprastanza seconstituescha senza.
2. La vischnaunca nova unifichescha sias leschas enteifer treis onns cun l'excepziun dalla lescha da baghegiar. Entochen che quei ei buc il cass, applichescha la suprastanza communalas transitoriamein per ils territoris dallas vischnauncas dad oz las leschas aunc vertentas da quellas vischnauncas.
3. Entochen l'entrada en vigur dalla fusiun astgan novs projects ch'eiin buca cunteni el plan da finanzas e d'investiziuns dil project da fusiun buca vegnir lubi.
4. La cummissiun da gestiun dalla vischnaunca nova controllescha il davos quen dallas vischnauncas veglias.

V. Disposiziun finala

Quest contract basegna l'approbaziun dalla Regenza dil cantun Grischun.

El ei vegnius approbaus allas radunonzas communalas d'Andiast e Waltensburg/Vuorz dils 24 da zercladur 2017 resp. alla votaziun all'urna a Breil/Brigels dils 25 da zercladur 2017:

Vischnaunca d'Andiast
Sievi Sgier, president

Gian-Luca Lutz, canzlist communal

Vischnaunca da Breil/Brigels
Clau Schlosser, president

Curdin Cadonau, canzlist communal

Vischnaunca da Waltensburg/Vuorz
Guido Dietrich, president

Gian-Luca Lutz, canzlist communal

Aschunta: uoppen

